




Ang Banagbanag

Ang Mantalaan sa Presensya ni Kristo

The Dawn in the Cebuano dialect

Sa Adlaw Nga Ang Kalibutan Matapos”	3
Usa ka Panan-awon kabahin sa Umalabot	15
Ang Pagpahiuli.....	17
Usa ka Bag-ong Kaugmaon	19
Kahibulongan Nga Mga Posibilidad.....	21

Sa Adlaw Nga Ang Kalibutan Matapos

“Ug sa naglingkod siya sa Bungtod sa mga Olivo, giduol siya sa mga tinun-an nga silasila ra, nga nanag-ingon, “Tug-ani kami, kanus-a man kini mahitabo, ug unsa man ang ilhanan sa imong pag-anhi ug sa pagkatapus sa kapanahonan?” **—Mateo 24:3**

Ang pahayag nga “Ang katapusan sa kalibutan” pamilyar na kaayo halos sa tanang katawhan, ug kini siya nagdala ug kahadlok sa mga hunahuna sa kadaghanan. Kini tungod sa naandan na nga konsepto niining mahinungdanong kalambuan sa plano sa Diyos sa kapanahunan. Niadtong panahon sa “dark age” nagtudlo nga ang katapusan sa kalibutan nga nahisulat sa Bibliya mao ang pagkagun-ob sa planetang Earth, ug nga niini unyang panahona ang tanang matinud-anong Kristyanos nga buhi pagabayawon ngadto sa langit ug ang tanang dili Kristyanos pagalaglagon.

Natural nga tungod niini nga konsepto sa katapusan sa kalibutan, kadaghanan sa nagasulti nga Kristyanos wala kaayo maghatag ug pagtagad sa paghunahuna niini, labaw pa gayud ang dili Kristyanos. Adunay gitooan sa kadaghanan ug nahisubay usab sa Kasulatan nga ang katapusan sa kalibutan adunay kalabutan sa Ikaduhang Pagbalik ni Kristo. Hinoon, imposible nga masabtan ug maayo kining duha ka pagtolun-an sama sa gitudlo sa Kasultan, samtang nagapadayon kita sa pagtoo niadtong naandang konsepto mahitungod sa katapusan sa kalibutan. Ang sinsero nga nagatoo sa Bibliya kinahanglan nga ipadaplin una ang mga naandang gitooan para makita ug masabtan ang punto gikan sa Kasulatan.

ANG KALIBUTAN MAGPABILIN

Matod pa sa Bibliya, ang planetang Earth dili gayud gubaon. Gisulat ni Solomon “Usa ka kaliwatan moagi, ug ang lain nga kaliwatan moabut; apan ang yuta mopabilin sa walay katapusan.” (Eccles. 1:4) Gipasabot ni Propeta Isaias nga ang rason nga ang

kalibutan magpabilin sa kahangturan tungod kay kini gidesinyo sa Diyos nga puy-an sa tawo, ug nga kini nga disenyo dili makawang. Atong kutloon: “Kay kini mao ang giingon ni Jehova nga nagbuhat sa mga langit, ang Dios nga nag-umol sa yuta ug naghimo niini, nga nagtukod niini ug nagbuhat niini nga walay nakawang, nga nag-umol niini aron pagapuy-an: Ako mao si Jehova; ug wala nay lain.”—Isaias 45:18

Kini nga saad sa Diyos nagpahinumdom kanato sa nahitala sa Genesis diin kita gipahibalo nga ang tawo gihimo sa Diyos diha sa iyang kaugalingong panagway, nga mao ang mamahimong pinuy-anan sa tawo nga walay katapusan. (Gen. 1:27,28) Gisulat didto nga “Ug si Jehova nga Dios nagbuhat ng usa ka tanaman sa silangan sa Eden ug gibutang niya didto ang tawo nga iyang giumol. Ug nagpaturuk si Jehova nga Dios gikan sa yuta sa tanan nga kahoy nga makapahimuot sa igtatan-aw, ug maayo nga kalan-on: ug ang kahoy usab nga sa kinabuhi diha sa taliwala sa tanaman, ug ang kahoy sa pag-ila sa maayo ug sa dautan.” Sa kamatooran, kini sila tanan nga kahoy sa kinabuhi—mga kahoy nga naghatag sa tanang gikinahanglan sustansya nga gikinahanglan sa tawo para kini magpadayon nga mabuhi sa kahangturan.—kapitulo 2:8,9

Apan, sama sa gipasabot sa bersikulo 17, aduna usab “kahoy sa kahibalo tali sa maayo ug dautan.” Si Adan gidid-an sa pagkaon sa bunga niini nga kahoy, ang silot sa pagsupak niini mao ang kamatayon. “Kay sa adlaw nga ikaw mokaon niini, ikaw gayud mamatay.” Nasayod na kita unsay nahitabo. Ang atong unang ginikanan nakasupak sa balaang kasugoan, ug ang silot sa kamatayon niabot kanila, ug sila gipapahawa sa ilang pinuy-anan gawas sa hardin para magpuyo sa nahabilin nilang kinabuhi ug mamatay.

Ang atong unang ginikanan nga nakasala nga niresulta sa kamatayon wala makausab sa orihinal nga disenyo sa Diyos nga ang kalibutan mamahimong pinuy-anan sa tawo sa kahangturan nga diin magpuyo siya nga mahingpit sa kinatibuk-an sa walay katapusang katuigan. Nagpasabot lamang kini nga sa balaanong kahan-ayan wala kini mosangko sa panahon sa Eden. Sa iyang plano, gani Siya nasayod na sa kalaglagan sa tawo ngadto sa sala ug kamatayon, ug naghatag Siya niini ug kaluwasan sa wala untay katapusang trahedyo. Kana nga kaluwasan pinaagi kang Kristo Hesus, “Kay gihigugma gayud sa Dios ang kalibutan nga tungod niana gihatag niya ang iyang bugtong Anak, aron ang tanan nga mosalig kaniya dili mahanaw, kondili may kinabuhing dayon.”—Juan 3:16

Niining maanindot ug ilado kaayo nga teksto, ang pulong “mahanaw” nagpasabot ug wala nay pagbalik. Samtang ang atong unang ginikanan ug ang tanan niining kaliwatan nahikatulog na diha sa kamatayon, ug ang tawhanong kaliwat nagpadayon na nga adunay kamatayon, dili kini siya walay katapusang kamatayon apan gihulagway kini siya sa Bibliya sama nga nahikatulog nga diin adunay paghigmata. Kini nga pagmata mahitabo tungod kay gihatag ni Hesus iyang pagkatawhanon pinaagi sa kamatayon isip bugti kang Adan ug iyang kaliwat. Gisulti ni Pablo, “Kay ang suhol gikan sa sala mao ang kamatayon, apan ang walay bayad nga gasa gikan sa Dios mao ang kinabuhing dayon diha kang Kristo Hesus nga atong Ginoo.”—Roma 6:23

Ang oportunidad nga makaangkon ug walay katapusang kinabuhi mahiabot sa katawhan human sila magmata gikan sa paghikatulog diha sa kamatayon. Busa, kon atong mahanduraw kon unsa unta ang nahitabo kon ang atong unang ginikanan wala mosupak sa kasugoan sa Diyos, atong maamgohan kon unsa ang dako nga disenyo sa Diyos nga nagpaabot sa katawhan. Tungod sa kamatayon ni Hesus isip Manluluwas sa katawhan, ang orihinal nga katuyoan sa Diyos para sa tawo magakahitabo pa.

ANG PAGHIULI

Ang parehong Daan ug Bag-o nga mga Testamento napuno sa mga saad ug propesiya nga naghatag kanato ug pasalig nga ang plano sa Diyos mao ang makapahiuli sa katawhan ngadto sa panglawas ug kinabuhi dinhi sa yuta. Usa sa mga nahisulat mahitungod niini atong makita sa ikatulong kapitulo sa basahon sa Buhat, ingon man ang unang duha ka mga bersikulo sa kapitulo 4. Mao kini siya ang nahitala sa gisermon ni Apostol Pedro human si Pedro ug Juan niayo sa usa ka piang nga tawo sukad pa sa iyang pagkabata. Human niini nga milagro, si Pedro namahayag nga sunod sa pagbalik ni Kristo moabot ang “paghiuli sa tanang butang.” (Buhat 3:20,21) Dugang pa nga gisulti ni Pedro nga niining panahon sa paghiuli nasulti na sa mga baba sa mga balaang propeta sukad pa sa sinugdanan sa kalibutan.

Kini siya nagpasabot nga kon ang kalibutan gubaon isip resulta sa pagbalik ni Kristo, ang mga propeta sa Diyos nga nagsulti na mahitungod niini dili diay mga balaan, kon dili mga bakakong propeta. Apan, hinoon, malipayon kita sa mga mapasaligong mga saad sa Pulong sa Diyos nga ang paghiuli mao gayud ang kinatumyan niyang gidesinyo para sa makasasala ug himalatyong katawhan.

UNSA ANG UMALABOT SA KATAPUSAN?

Usa sa mga talagsaong pagtolun-an sa Bibliya mao nga ang kalibutan karon, sa hustong panahon sa Diyos, matood gayud nga moabot sa pagtapos. Sa atog makita hinoon, kini wala nagpasabot ug litiral nga pagkaguba sa kalibutan. Kon dili kining dautang kahan-ayan nato karon mao ang “kalibutan” nga mao ang gubaon nga gihulagway ni Propeta Daniel nga “panahon sa kagubot, “panahon sa kasamok, nga wala pa mahitabo sukad nga adunay nasud.”—Daniel 12:1

Usahay ang mga propesiya mahitungod sa katapusan sa kalibutan nigamit ug kalayo isip simbolo sa mga gahum nga makaguba niining porpesiyanhong Panahon sa Kaguliyang. Lain usab nga mga simbolo ang gigamit, gikan sa usa ka panan-awan ug sa usa, aron sa paghulagway ssa pamaagi diin kini nga dautang kahan-ayan karon pagubaon. Dinhi sa Bag-ong Testamento, ang pulong “kalibutan” kanunay nga gigamit aron sa pagpakita niini, ug sa mao kini nga pag gamit nga naghatag sa kadaghanan sa nangagi nga makaiingon nga mao kining planetang Earth ang gubaon. Apan, kining pulong “earth”gigamit sa makadaghan sa Daang Testamento diha sa kahintang nga tataw nga nagpakita nga dili litiral nga planeta ang gipasabot. Pananglitan, sa Jeremias 22:29 atong mabasa, “Oh yuta, yuta, yuta, pamati sa pulong ni Jehova.” Tataw dinhi nga dili ang planeta ang giingnan nga maminaw, kon dili ang katawhan, u gang kalambigitan sa katawhan sa kalibutan.

Sa usa sa mga propesiya mahitungod sa katapusan sa kalibutan, atong mabasa, “Busa paghulat kamo kanako, nagaingon si Jehova, hangtud sa adlaw nga ako motindog alang sa tukbonon; kay ang akong hugot nga tinguha mao ang pagtigum sa mga nasud, aron pagatigumon ko ang mga gingharian, aron ibubo ko sa ibabaw nila ang akong kayugot, bisan ang tanan nakong mabangis nga kasuko; kay ang tibook nga yuta pagalumpagon pinaagi sa kalayo sa akong pagpangabugho.” (Zeph. 3:8) Kini nga panagtigom sa mga kanasuran nga may kalabutan sa propesiyanhong Panahon sa Kaguliyang---diin sa katapausan moguba sa dautang panahon karon—mahitabo sa daghanang katuigan.

Dinhi gipahibalo kita sa propeta nga ang determinayon sa Diyos nga “molamoy” sa tibook kalibutan uban sa kalayo sa iyang kasibot. Atong mahibal-an kon unsay gipasabot sa pulong “lamoy” pinaagi sa pagsusi sa mga pulong sa lain pang mga balaang Propeta sa Diyos. Sa Daniel 7:23, kini nga pulong gigamit usab sa pagrepresentar sa usa

ka “gingharian.” Kadaghan sa mga tinun-an sa propesiya nagtoo nga kini siya nagpasabot sa daan nga Romano nga Imperyo, mahitungod sa gisulat ni Daniel, “Ang ikaupat nga mananap mao ang ikaupat nga ginghamian sa yuta, nga lahi gikan sa tanang mga ginghamian ug molamoy sa tibook yuta, ug magayatak niini, ug magadugmok kaniya.” Dili na kinahanglan pa nga lalisan nga ang gipasabot dinhi dili mao ang litiral nga kalibutan. Kini mao ang propesiya nga nahitabo na pila na ka siglo ang nangagi, apan ang atong planetang earth sa gihapon nagpabilin. Hinoon, ang simbolikanhong “earth” “gilamoy” na sa pagasdang sa Romanong Imperyo, ug daghang mga kanasuran ang giyatakan ug nawataswatas isip resulta niini.

ANG DIYOS GIBAYAW SA YUTA

Ang Salmo 46 adunay makapaikag nga propesiya mahitungod sa pagtapos sa kalibutan. Diha sa dakong panahon sa pagkagun-ob nga simbolikanhong gihulagway, ang kalibutan: “giwagtang,” ug usab “gitunaw.” (bersikulo 2,6) Apan, human sa paghulagway sa panahon sa kagubot ug kaguliyang nga moresulta niini, ang Diyos miingon, “Humilum kamo ug ilhon ninyo nga ako mao ang Dios. Pagabayawon ako sa taliwala sa mga nasud, pagabayawon ako dinhi sa yuta.” (bersikulo 10) Kining ulahi nagtumong sa litiral nga kalibutan nga magapabilin aron mamahimong puluy-anan sa tawo sa walay katapusan, ug kini siya nagpabilin sa gihapon bisan pa nga ang simbolikanhong kalibutan “giwagtang” ug “gitunaw” na.

Ang propesiya sa Salmista nagpadayon: “Umari kamo, tan-awa ang mga buhat ni Jehova, Unsa ang mga pagkalaglag nga gibuhay niya sa yuta. Nagapahunong siya sa mga gubat hangtud sa kinatumyan sa yuta; Gibali niya ang pana, ug gibunggo ang bangkaw; Sa kalayo gisunog niya ang mga carro.” (Salmo 46:8,9) Ang gubat maoy usa sa makalilisang nga kinaiyahan niining dautang kalibutan nato karon. Dinhi gipasaligan kita sa propeta sa Diyos nga sa katapusan, sa dihang ang Diyos moingon, “pagmalinawon” taliwala sa nagkaguliyang ug nagkagubot nga kanasuran sa yuta, ang gubat mao ang butang nga nangagi na lamang, kay ang kagub-anan niining dautang kahan-ayan karon magdala ngadto sa sinugdanan sa bag-ong kahan-ayan.—Ang bag-ong kalibutan sa Diyos ugma damlag.

ANG PROPESIYA NI HESUS

Sa atong namatikdan, ang mga propesiya sa Bibliya naglambigit sa katapusan sa kalibutan diha sa pagbalik ni Hesus. Matood, Siya

ang gamhanang hari sa bag-ong kalibutan sa Diyos. Sa hinapos nga bahin sa pagpangalaga ni Hesus sa kalibutan gipangutana siya sa iyang mga tinun-an mahitungod sa mga timaan sa gisaad nga iyang pagbalik. Sa nahitala sa atong pasiuna nga teksto, sila nangutana, “Kanus-a man kini mahitabo, ug unsa man ang ilhanan sa imong pag-anhi ug sa pagkatapus sa kapanahonan?” (Mateo 24:3) nagkalain laing hubad naghatag sa katapusang parte niini nga bersikulo isip “katapusan sa panahon,” ug mao kini ang pasabot sa orihinal nga teksto sa pinulungang Griyego. Mao nga ato dayon nga masabot nga ang pangutana sa mga tinun-an wala nagtumong sa katapusan sa pisikal nga planeta, kon dili ang pagtapos sa sosyal nga kahan-ayan o “panahon” nga maghatag ug dalan sa bag-o nga panahon nga adunay katarong.

Diha sa iyang tubag niin nga pangutana, si Hesus naghigot ug daghanang mga butang nga mahitabo sa yuta sa panahon sa iyang presensya—ang katapusan mao nga kadtong magkita nga angayan sa kinabuhi sa panahon sa umalabot nga paghukom “makapanunod sa gingharian nga giandam para kanila gikan sa pagsugod sa kalibutan.”—Mateo 25:31-34

Sa iyang propesiya, gihisgotan ni Hesus ang daghang panghitabo nga mag-una niini kinatумыang paghiuli sa masinundanon ngadto sa kinabuhi ug ngadto sa nawala nilang paraisong kahimtang. Iyang gitumong, pananglitan ang dakong propesiya ni Daniel sa Panahon sa Kagubot nga wala pa masukad isip usa ka nasud, nga gihulagway kini nga usa ka dakong “kasakitan” nga mahiabot sa tanang katawhan sa kalibutan. Siya niingon nga kini nga kasakit makalisang kaayo nga kon dili kini hunongon sa madaling panahon walay lawas nga makasugakod niini. Kini dayag, nga kita mitoo, nga kita karon nagpuyo na sa panahon nga gihulagway ni Hesus. Kini nagpasabot nga nagtan-aw na kita sa “kalibutan” nga moabot na sa katapusan. Apan hinoon, gipasaligan kita ni Hesus nga ang panahon sa kasakitan, o kaguliyang, pagaputlon sa dili pa ang tanang katawhan mangawala.—Mateo 24:21,22

Mao nga makaangkon kita sa kahupayan niini sa atong pagtamod kon unsa ang gakahitabo sa tibook kalibutan karon. Nasayod kita nga ang kalaglagan sa tawhanong kaliwat gihulga pa gihapon sa dili husto nga pag gamit sa gahum nga nuklear. Ang polusyon sa kinaiyahan ug gakausab nga klima padayon nga nagbutang sa peligro sa tawhanong kaliwat, sama sa posible nga pag gamit sa biological ug kemikal nga mga armas sa mga salbahis nga kanasuran.

Ang tibook kalibutang paghunong sa sistema sa komunikasyon, pinansyal nga merkado, o kaha computer network aduna usab makadestrosong epekto sa nagapadayon nga pagpuyo sa tawo. Ang Magtutudlo nagpasalig kanato, hinoon nga pinaagi sa pinili sa Diyos—ang Kristo, ulo ug miyembro sa lawas—adunay balaanong pagpanginlabot diha sa mga kalihokan sa katawhan sa husto nga panahon aron mapugngan ang tanan nga nalista sa unahan nga mga panghitabo nga magun-ob ang katawhan u gang kalibutan nga ilang gipuy-an.

TULO KA KALIBUTAN

Ang Bibliya nagsulti sa tulo ka kalibutan, ang usa magsunod sa usa, dinhi sa planetang Earth. Anaa kadtong kalibutan kaniadto sa wala pa ang Lunop, nga kalagmitan gitawag ug “antediluvian” [sa wala pa ang lunop] Anaa usab ang “dautang kapanahunan karon”, nga gihulagway ni Apostol Pablo (Galacia 1:4) Sa katapusan, aduna kadtong “kalibutan nga umalabot.”—Heb. 2:5

Simbolikanhon kining gihulagway ni Pedro sa ilang espiritoohanon ug material nga aspeto nga “ang kalangitan ug ang yuta.” Mahitungod sa kalibutan nga wala pa ang lunop, namatikdan ni Pedro, “Sila nagpakabuta sa tinuod nga butang nga mao kini, nga sa karaang panahon pinaagi sa pulong sa Dios, dihay mga langit nga nanaglungtad, ug usa ka yuta nga naumol gikan sa tubig ug pinaagi sa tubig, nga pinaagi niini ang kalibutan nga naglungtad kaniadto gilunopan sa tubig ug nalaglag.” (II Pet. 3:5,6) Siya nagpadayon, “Apan pinaagi sa mao ra usab nga pulong ang mga langit ug ang yuta nga karon nagalungtad gikatagana alang sa kalayo, ginatipigan alang sa adlaw sa panudya ug sa kalaglagan sa mga tawong dili diosnon.”—bersikulo 7

Sa bersikulo 13, si Pedro nisulti, “Apan sumala sa iyang saad kita nagapaabut sa bag-ong nga langit ug usa ka bag-ong yuta diin nagapuyo ang pagkamatarung.” Kining bag-ong langit ug bag-ong yuta mao ang ikatulong kalibutan—ang “kalibutan nga umalabot.” Ang unang bahin niana nga kalibutan mao ang usa ka libong katuigang pagdumala ni Kristo ug sa iyang gihimayang iglesya ibabaw sa katawhan. Mao usab kini ang usa ka libong katuigan sa paghukom sa katawhan. Mao kini nga mga rason nga si Pedro nitumong sa bag-ong kalangitan ug yuta isip nagrepresentar sa matarong nga kahimtang, ug gani ang katapusang mga timaan sa sala dili hingpit nga magun-ob hangtod sa katapusan sa unang libo ka tuig nianang bag-ong “kalibutan.”—Pinadayag 20:4,6,11,12

ANG “ADLAW”

Ang ulohan niini nga artikulo mao “Sa Adlaw nga ang Kalibutan Matapos,” nga nagpunting sa panahon sa paglihok sa plano sa Langitnong Amahan diin kining dautang kalibutan nato karon gubaon aron ang bag-ong kalibutan sa Diyos ugma damlag maestablisar. Ang katapusan niining kalibutan karon u gang pagestablisar sa bag-o matuman diha sa usa ka yugtong panahon, ang gitas-on niini ang Diyos lamang ang nakahibalo, ug wala pa kini mapadayag ngadto sa iyang katawhan. Ang panahon diin ang kalibutan saw ala pa ang lunop natapos gitumong sa Kasulatan nga “Ang mga Adlaw ni Noah.” Samtang ang Diyos mao ang naghimo nga ang tubig ang mogun-ob sa kalibutan, si Noah ang doul kaayo nga adunay kalambigitan sa panghitabo, kay siya man ang naghimo sa arko diin siya ug iyang pamilya gidala ngadto sa bag-ong kalibutan.

Si Pedro nagsulti sa panahon diin ang dautang kalibutan karon matapos isip “ang adlaw sa Ginoo” ug “ang adlaw sa Diyos.” Ang ubang propesiya naghulagway niini isip adlaw sa kaligutgut sa Diyos diha sa dautang kahan-ayan nga magdala ngadto sa kagun-oban. Sa propesiya ni Pedro, ang mga elemento sa kalaglagan gisimbolohan ug kalayo. Siya niingon, , “Apan ang adlaw sa Ginoo moabut sama sa usa ka kawatan, ug unya ang mga langit mawagtang uban sa dakung dinagook, ug ang mga kasugdanan sa kalibutan mangatunaw sa hilabihang kainit, ug pagasunogon ang yuta ug ang mga buhat nga ania niini. Sanglit kining tanang mga butanga pagatunawon man sa ingon, pagkakinahanglanon gayud diay nga magkinabuhi kamo sa pagkabalaan ug pagkadiosnon, nga magapaabut ug magapadali sa pag-abut sa adlaw sa Dios, nga tungod niini pagaduslitan ug pagatunawon ang mga langit, ug ang mga kasugdanan sa kalibutan mangatunaw sa kalayo!”—II Pedro 3:10,12

Sa pagbasa niini nga paghulagway sa kalaglagan niining dautang kalibutan karon, mahinungdanong atong bantayan nga sa dihang ang kalibutan sa wala pa ang lunop gilaglag, kini yanong nagpasabot nga ang gilaglag lamang mao ang kahan-ayan sa maong kalibutan, dili ang pag guba sa yuta mismo. Busa, mao usab nga sa karon, dili ang pag guba sa yuta ang mahitabo kon dili ang paglaglag sa dautang kalibutan karon. Ang kahan-ayan sa dautang kalibutan karon—sibil ug relihiyosong sistima, dili ang katawhan—ang gun-obon. Sa dugay na nga panahon, ang Diyos nagsaad nga dili na gayud gubaon ang tanang unod sa yuta.—Gen. 8:21

Ang kalayo mao lamang ang usa sa mga simbolo nga gigamit sa Diyos sa Bibliya aron magtimaan sa paagi diin ang dautang kalibutan sa karon gub-on, parehong ang aspetong relihiyoso---ang “kalangitan”---ug ang sibil ug sosyal nga aspeto---ang “yuta.” Ang Kasulatan migamit usab ug bagyo, alimpulos, linog ug uban pa nga mga simbolo---bisan pa ang baha---para magsimbolo nga ato na nga makita karon nga gakahitabo sama sa gubat, rebolusyon, kagubot, pagkaguba sa ekonomiya, sosyal nga kagubot, ug mga susama niini---ang tanan magdugan pa sa kagubot, nga sa kaulahian moresulta sa hingpit nga pagkabungkag sa “kalibutan” karon. Matood, karon mao ang “adlaw” diin ang atong kalibutan karon anaa na sa proseso sa iyang katapusan.

Sa iyang propesiya, si Pedro nagtimaan sa bug-os nga panahon sa “kalangitan ug yuta, nga anaa karon,” sa dihang siya miingon nga sila “gigahin ngadto sa kalayo hangtud sa adlaw ssa paghukom.” Ang Revised Standard Version naghatag ug mas klaro nga pagppasabot sa maong hunahuna. Kini nga hubad mabaa, “Pinaagi sa pulong sa Diyos ang langit namugna niadtong dugay na nga panahon, ug ang yuta naporma gikan sa tubig ug pinaagi sa tubig, nga diin ang kalibutan kaniadto nahanaw diha sa tubig, Apan pinaagi sa maong pulong, ang langit ug yuta nga ania karon nagpabilin, ug magpabilin hangtud sa adlaw sa paghukom ug paghanaw sa mga dili diosnong katawhan.”—II Pedro 3:5-7

Ang unang kalibutan nagpadayon hangtud nga kini giguba sa tubig niadtong lunop. Ang ikaduhang kalibutan nagpadayon pa, bisan pa man nga anaa siya sa “kalayo” ug padayon nga magpabilin hangtud sa adlaw sa paghukom ug sa paglaglag sa mga dili diosnong katawhan. Samtang adunay pag guba sa tawhanong kinabuhi nga mahitabo pinaagi sa simbolikanhong kalayo sa Adlaw sa Ginoo, dili kini mao ang gipasabot ni Pedro dinhi. Ang kalaglagan karon para sa mga institusyon ug dautang kanasuran---and dautang kalibutanong kahan-ayan---ug dili ang katawhan.

Ang gisulti ni Pedro mahitungod sa “paglaglag sa dili diosnong katawhan” nagtumong sa umalabot nga adlaw sa paghukom. Nianang higayona, kadto lamang wala maminaw sa propeta ang “pagalaglagon sa mga katawhan.” Kini sila mao gayud mga “dili diosnon,” ang mga tinuyong makasasala, sila mao ang pagalaglagon ngadto sa “ikaduhang kamatayon.”—Buhat 3:22,23; Pinadayag 20:12-14

Unsa gayud kalahi ang paghukom sa usa ka libro ka tuig nga panahon, hinoon, para sa mga matarong---kadtong malipayon nga midawat sa matood nga kahibalo sa Ginoo kay ipadayag naman kanila ang tanan. Gihulagway sa salmista unsa kamalipayon nga panahon kini para kanila: “Papaglipaya ang kalangitan, papagmayaa ang yuta; Padahunoga ang dagat, ug ang pagkapuno niana; Pabayawa ang kapatagan, ug ang tanan nga anaa kaniya; Unya ang tanang kakahoyan sa lasang manag-awit sa kalipay sa atubangan ni Jehova; kay moabut na siya, Kay siya moanhi sa paghukom sa yuta: Pagahukman niya ang kalibutan uban ang pagkamatarung, Ug ang katawohan uban ang iyang kamatuoran.” Salmo 96:11-13

BAG-ONG KALANGITAN UG YUTA ANG GISAAD

Human gipanagna ang kalaglagan sa kalangitan ug yuta sa pagkakaron sa Panahon sa Kagubot nga iyang gisimbolohan sa kalayo ug kasaba, gidugang ni Pedro pag ingon, “Apan sumala sa iyang saad kita nagapaabut sa bag-ong nga langit ug usa ka bag-ong yuta diin nagapuyo ang pagkamatarung.” (II Pedro 3:13) Sa gipakita ni Pedro, ang una ug ikaduha nga simbolikanhong kalangitan ug yuta naglungtad sumala pa sa Pulong sa Diyos. Karon iyang gipasabot nga matood usab ang bag-ong kalangitan ug bag-ong yuta—kini matod pa sa mga pulong nga gisaad sa Diyos.

Mahinungdanon niini nga mga saad mao kadtong mabasa sa Isaias 65:17, nga nagkanayon, “Kay, ania karon, ako nagahimo ug bag-ong mga langit ug usa ka bag-ong yuta; ug ang unang butang dili na pagahinumduman, ni motungha pa sa hunahuna.” Si Isaias padayon nga nagpasabot nga dinhi sa bag-ong langit ug bag-ong yuta “sila magatukod ug mga balay, ug magapuyo niini; ug sila magatanum ug mga kaparrasan, ug makakaon sa ilang bunga. Sila dili magatukod, ug unya lain ang magapuyo; sila dili magatanum, ug unya lain ang magakaon: kay ingon sa mga adlaw sa usa ka kahoy mao man ang mga adlaw sa akong katawohan, ug ang akong mga pinili magapahimulos pag-ayo sa buhat sa ilang mga kamot.” (bersikulo 21,22) Atong makita nga kini nga mga kalihokan nahitabo dinhi sa yuta, nga ania pa gihapon human nga ang simbolikanhong kalangitan ug yuta maguba.

Si Juan nga Tigpadayag, sa panan-awon nga gihatag kaniya sa nabanhaw nga Ginoong Hesus samtang didto sa Isla sa Patmos, nakakita sa gisaad nga bag-ong kalangitan ug yuta, ug gihulagway kini niini nga paagi: “Ug unya nakita ko ang usa ka bag-ong langit

ug ang usa ka bag-ong yuta; kay ang unang langit ug ang unang yuta nangahanaw na man, ug ang dagat wala na. Ug nakita ko ang balaang siyudad, ang bag-ong Jerusalem, nga nanaug gikan sa langit gikan sa Dios, gitagana maingon sa usa ka pangasaw-onon nga gidayandayanan alang sa iyang pamanhonon. Ug nadungog ko gikan sa trono ang usa ka dakung tingog nga nag-ingon, “Tan-awa, ang puloy-anan sa Dios anaa uban sa mga tawo. Siya magapuyo ipon kanila ug sila mahimong iyang katawhan, ug ang Dios gayud mao ang magpakig-uban kanila ug mahimong ilang Dios. Ug iyang pagapahiran ang tanang luha gikan sa ilang mga mata, ug ang kamatayon wala na; ug wala na usab unyay pagminatay, ni paghilak, ni kasakit, kay ang unang mga butang nangagi na.” Ug ang naglingkod sa trono miingon, “Tan-awa, ginabag-o ko ang tanang mga butang.” Usab miingon siya, “Isulat mo kini, kay kining mga pulonga kasaligan ug matuod.”—Pinadayag 21:1-5

Ang “bag-ong Jerusalem” nga gisulti ni Juan mao ang panon ni Kristo, nga gisimbolohan sa pamanhonon ug pangasaw-onon. Mao kini ang maglangkob sa “bag-ong langit” ug magadumala sa katarong ibabaw sa “bag-ong yuta.” Pagkamahinungdanon usab ang saad sa Diyos nga iyang bag-ohon ang tanang butang dinhi sa yuta—ang kalibutan nga magpabilin sa kahangturan, ug nga makasaksi unya sa katumanan sa kagustuhan sa Diyos sa kinatibuk-an sa yuta, maingon nga natuman didto sa langit.

Ang mahinungdanon sa “tanang butang” nga pagailisan, mao ang pagwagtang sa kasakit ug kamatayon. Hunahunaa kon unsa kini para sa kasinatian sa tawo. Wala na ang panginahanglan sa ospital, mga doktor, nars, mga botika ug uban pa---hinoon kini sa pagkakaran dako kaayo kini nato ug tabang. Atong pasalamatan ang Langitnong Amahan sa mga nakatabang nga mga serbisyo, apan mas mapasalamaton kita sa umalabot nga mga mahimayaong kondisyon sa bag-ong kalangitan ug bag-ong yuta diin ang mga sakit ug kamatayon mismo sa bisan unsa nga hinungdan ang mawagtang na.

Gisulat ni Isaias ang mahitungod sa umalabot nga bag-ong kalibutan nga nagkanayon, “Kay si Jehova mao ang atong maghuhukom, si Jehova mao ang atong maghahatag sa balaod, si Jehova mao ang atong hari; siya magaluwas kanato.” (Isaias 33:22) Dugang pa sa Bersikulo 24, “Ug ang molupyo dili magaingon: Ako masakiton man: ang katawohan nga nagpuyo niini pagapasayloon sa ilang kasal-anan.” Pagka anindot nga maamgohan nato nga kon ang Ginoo

ang Huwes, Maghatag sa Balaod ug Hari, iya gayud nga luwason ang katawhan gikan sa kasakit, pag-antus, sala ug kamatayon.

Ang makasasalang kondisyon sa katawhan, nga nagsugod sa orihinal nga sala sa Hardin sa Eden ang padayon ngamiresulta sa sakit ug kamatayon. Apan, pinaagi sa kamatayon ni Hesus, gihatagan kita sa Diyos ug kaluwasan gikan sa sala ni Adan. Gisulat ni Pablo, “Kay maingon nga diha kang Adan ang tanan nangamatay, maingon man usab diha kang Cristo ang tanan mangabuhi.” (1 Cor. 15:22) Kini nagpasabot nga dugang sa pagwagtang sa mga sakit, ang daghanang katawhan nga atua na sa lubnganan pagabangonon gikan sa ilang paghikatulog diha sa kamatayon. Ang tanan nga nahimong masinundanon sa mga balaod nga matarong sa gingharian makakabot ug hingpit , ug walay katapusang kinabuhi dinhi sa yuta. Ug sa ingon mapamatud-an na nga wala nay kamatayon. Matood nga, “Ug ang katapusang kaaway nga pagalaglagon mao ang kamatayon.”—bersikulo 26

ANG PAGLAUM

Makapaikag ug maanindot ang paglaum nga gihatag kanato sa mahinungdanong mga saad sa Diyos nga bag-ong kalibutan sa Diyos ugma damlag. Kadtong makahimo sa paghupot niining mga bililhong saad diha sa pagtoo magmaya nga makita ang mga kamatooran nga ang dautang kalibutan karon matapos na unya.

Samtang daghan kaayo ang mga maayo nga anaa kanato karon, sa kinatibuk-an kini usa ka dili matarong nga kalibutan. Kini siya napuno sa sala, kahakog, sakit ug kamatayon. Magmalipayon kita nga dili na kini magpadayon—nga gani sa pagka karon anaa na siya sa prosesong pagwagtang niini. Sa dili madugay hingpit na gayud kining mahanaw, isip pag-andam sa bag-ong kalibutan sa Diyos, ang “bag-ong kalangitan ug bag-ong yuta nga diin maghari ang katarong.” ■

Usa ka Panan-awon kabahin sa Umalabot

Yabeng Bersikulo:
“Kay, ania karon, ang mga adlaw moabut na, nagaingon si Jehova, nga dalhon ko pag-usab ang pagkabinihag sa akong katawhan nga Israel ug Juda, nagaingon si Jehova: ug pabalikon ko sila ngadto sa yuta nga gihatag ko sa ilang mga amahan, ug sila magapanag-iya niini.”-
Jeremias 30:3

Napiling Kasulatan:
Jeremias 30:1-3,18-22

Sa atong mga leksyon karong bulana, atong pagatukion ang daghang propesiyanhong mga pahayag gikan sa libro ni Jeremias diin naglakbit-saysay sa pipila sa mga panalangin ug mga probisyon sa Dios nga maoy moduyog sa umaabot nga Mesiyanhong gingharian. Niini nga mga propesiya, ang Israel ug Judah-ang duha ka dibisyon sa Judeo nga nasod diin niresulta pagkahuman sa kamatayon ni haring Solomon. Sila gayod ang giila isip mga tagadawat niini nga mga panalangin. Tungod kay sila man ang katawhan kinsa naghimo ug kasabotan ang Dios tali kanila atol sa panahon sa Daang Tugon, ug mga “pinalangga alang sa pahinungdan sa ilang mga ginikanan,” bisan pa man sa daghan nilang mga kapakyasan. -- Roma 11:28

Niini nga mga propesiya, ang Israel mao man usab ang ehemplo sa tibuok katawhan sa kalibutan, kinsa, sama sa Judeo nga nasod, napakyas sa pagtuman sa matarong nga mga balaod sa Dios. Kini ang tinguha sa Dios alang “sa tanang tawo [Judeo man o Hentil pareho ra], nga mangaluwas, ug managpakakab-ot sa kahibalo sa kamatuoran.” (1 Timoteo 2:4) busa, samtang atong gikonsidera ang propesiyanhong mga pulong sa propeta ni Jehovah, angay natong hinumdoman kining duha ka aplikasyon - alang sa Israel, ug ingon man usab sa kalibutan sa kinatibuk-an. Gani, ang saad nga gihatag ngadto kang Abraham mao nga pinaagi sa iyang kaliwat “ang tanang mga nasod sa yuta pagapanalanginan.” -- Gen 22:18

Nagapamulong pinaagi sa propeta, ang GINOO sa atong Yabeng Bersikulo sa atong leksyon nagaingon nga Iyang dalhon pag-usab ang pagkabinihag sa Akong katawhan.” Ang susamang hugpong

sa mga pulong gigamit pag-usab sa bersikulo 18. Sa unang pagtan-aw, kini nga mga pulong mura'g dili panalangin, apan usa pa ka dugang nga silot. Hinuon, ang mga pulong “dalhon pag-usab” kay mas husto nga pagahubaron sa ingon niini, “balikan” o “bakwion” - ang pasabot nga ang Dios maabakwi sa pagkabinihag sa Iyang katawhan. Dul-an na sa bayente-singko ka mga siglo, ang Israel ug ang katawhan niini mga bihag sa ubang mga nasod. Si Jesus nagsulti nga “pagayatakan sila sa mga Hentil, hangtud matuman na ang mga panahon sa mga Hentil.” - Lucas 21:24

Daghang mga ebidensiya ang gipakita kanato nga niadtong 1914, ug ingon nga resulta sa Unang gira sa Kalibutan, kining “mga panahon sa mga Hentil” natuman na, ug ang pagkabinihag sa Israel niini nga mga nasod “nabakwi na.” Dugang pa nga pagkutlo sa atong Yabeng Bersikulo, nag-ingon ang Dios nga sa human sa pagtapos sa ilang pagkabinihag, nga “pabalikon ko sila ngadto sa yuta nga gihatag ko sa ilang mga amahan, ug sila magapanag-iya niini.” Ang Delarasyon ni Balfour niadtong 1917 nagtugot sa mga Judeo nga mobuhat gayod niini-nibalik sa ilang yuta - ug mga katloan ug usa lamang ka tuig, niadtong 1948, sa makausa pa ang Israel nahimo na usab nga usa ka gamhanang nasod.

Bisan tuod ang nahauna nagapresentar ug usa ka mahinungdanong paglantaw sa mga pulong ni Jeremias, aduna pa gayoy mas dako nga propesiyanhong panan-aw nga gusto namong isulti. Kini matuman sa gingharian sa Mesias,, ug makaapekto dili lamang sa nasod sa Israel, apan sa tibuok katawhan. Ang pagkabinihag sa Israel sulod sa daghang mga siglo ngadto sa Hentil nga mga nasod, sa daghang mga paagi, usa ka ehemplo sa pagkabinihag nga ginaantos sa tawo sukad pa sa pgkasala sa atong unang ginikanan. Mao kini ang pagkabinihag ngadto sa sala, pag-antos, ug kamatayon, diin walay si bisan kinsa nga makaikyas niini, bisan pa man sa labing maayong mga pagkugi sa siyensiya ug medisina.

Ang Dios, sa laing bahin, sama nga gisaad Niya sa Israel ang ilang pagkalingkawas sa ilang pagkabinihag, nagsaad usab sa tibuok katawhan ug kalingkawasan gikan sa kaulipnan sa sala ug kamatayon. Si Jesus, diha sa paghatag sa bili sa lukat, nagsigurado niana nga pagbuhi alang kang Adan ug sa tanan niyang kaliwatan. Ang katuyoan sa umaabot nga gingharian ni Cristo mao ang hingpit nga pagtapos sa pagkabinihag sa katawhan - ang pagpabuka sa mga mata sa mga buta, ang pagpagula sa mga binilanggo gikan sa bilanggoan, ug sila nga nanaglingkod sa kangitngitan gikan sa balay nga bilanggoanan.” - Isaías 42:7 ■

Senemanang Pagtolun-an Sa Bibliya

Leksyon Para sa Septyembre 14, 2014

Ang Pagpahiuli

Yabeng Bersikulo: Plano kini sa Dios alang sa katawhan
“Ania karon, ang mga adlaw moabut na, nagaingon si Jehova, nga ako magabuhat ug usa ka bag-ong tugon uban sa balay sa Israel, ug uban sa balay sa Juda.”- Jeremias 31:31

Napiling Kasulatan: Jeremias 31:31-37 nga ang matag usa mahatagan ug kahigayonan alang sa paghiuli sa tanan nga nawala sa dihang nakasala ang atong unang ginikanan. Kini mao ang kahingpitan sa kahimsog ug kinabuhi, pagdumala sa yuta, ug ang pagpakig-ambit ug pabor sa Dios. Ang Apostol Pedro naghisingot mahitungod niini nga gisaad nga panahon ingon nga usa ka panahon sa “pagpahiuli [restorasyon] sa tanang mga butang,” nagaingon nga ginasulti na kini pinaagi sa “mga baba sa tanang mga balaang propeta sa Dios sukad pa sa sinugdan sa kalibutan.” - Mga Buhat 3:21

Usa sa mga matinud-anong propeta sa Dios, si Jeremias, nagahisingot niining umaabot nga panahon sa pagpahiuli sa mga bersikulo sa atong leksyon karong adlaw. Kini nga mga pulong nakasentro gayod sa Israel ug Judah. Sa laing bahin, sa ato nang nahibaw-an (tan-awa ang leksyon sa Septyembre 7), sa daghang mga paagi “tipikal” kini sa tanang katawhan. Ang Judeong nasod nailawom sa kasabotang tugon sa Dios. Gibutang nila ang ilang mga kaugalingon niana nga kahimtang sa dihang niuyon ug nisaad sila nga tumanon ang balaod sa Dios human kini gipresentar ngadto kanila. Namulong pinaagi kang Moises, ang Dios nag-ingon, “Busa karon, kong kamo magapatalinghug gayud sa akong tingog, ug magabantay kamo sa akong tugon, nan kamo mamahimo nga akong kaugalingon nga bahandi gikan sa kinataliwad-an sa tanang mga katawhan.” Isip tubag niini, “ang tanan nga katawhan nanagdungan sa pagtubag, ug miingon: Ang tanan nga giingon ni Jehova among pagabuhaton. Ug si Moises nagsugilon sa mga pulong sa katawhan ngadto kang Jehova.” - Exodo 19:5,8

Tungod sa katinuoran nga ang balaod sa Dios perpekto, ug wala ni bisan usa didto sa Israel nga takos sa ingon niana ka hataas

nga sukdanan, ang Judeong nasod wala makahimo sa pagtuman sa ilang kasabotan tali sa Dios. Si Propeta Jeremias nagsulat kabahin niini, nga nagaingon, “Ang akong tugon ilang gilapas, bisan ako mao ang ilang bana, nagaingon si Jehova.” - Jeremias 31:32 Si Jesus lamang, nga “gipakatawo sa usa ka babaye, nagkinabuhi ilawom sa Kasugoan” nga tugon, ang hingpit nga nakahimo sa pagtuman sa mga termino nga gikasabotan sa Israel diha sa Dios. (Galacia 4:4) Pinaagi sa pagbuhat sa ingon, ug sa dugang pa nga mahinungdanong lakang sa pagkamatay isip manunubos sa katawhan, gipapas ni Jesus ang “listahan sa mga sala batok sa israel, ug “kini iyang gikuha sa atong agianan ug gilansang sa krus.” - mga taga-Colosas 2:14

Kini nga buhat sa atong Ginoo atol sa iyang unang paghiabot naghimo ug posibilidad sa mga panghitabo diin hapit na mahitabo atol sa gingharian sa Mesias. Kay natubos naman ang Israel gikan sa “tunglo sa balaod,” ug ang tanang katawhan gikan sa “tunglo” nga gideklara didto sa eden, ang entablado naandam na alang sa “bag-ong kasabotan” nga pagahimoon uban sa katawhan sa Dios - ang Israel ug Judah - ug ang tanan nga anaa kang Adan.” (Galacia 3:13; Gen. 3:17; Pinadayag 22:1-3; I Corinto 15:22)

Ang atong Yabeng Bersikulo propesiyanhong naghigot kabahin niining bag-ong kasabotan, ug ang mga nagsunod nga mga bersikulo nidugang niining importanteng mga pulong, “Mao kini ang [bag-o] nga tugon nga pagabuhaton ko uban sa balay sa Israel sa tapus niadtong mga adlaw, nagaingon si Jehova: Ibutang ko ang akong Kasugoan sa ilang sulod nga mga bahin, ug diha sa ilang kasingkasing kini isulat ko; ug ako mahimong ilang Dios, ug sila mahimong akong katawhan. Ug sila dili na gayud magtudlo ang tagsatagsa ka tawo sa iyang isigkatawo ug ang tagsatagsa ka tawo sa iyang igsoon, sa pag-ingon: Ilhon mo si Jehova: kay silang tanan managpakaila kanako, gikan sa labing diyutay kanila ngadto sa labing daku kanila, nagaingon si Jehova: kay pasayloon ko ang ilang kasal-anan, ug dili na gayud hinumduman ko ang ilang sala.” - Jeremias 31:33-34

Ang Bag-ong Tugon, nga gipamatud-an usab ni Pablo, (tan-awa ang Hebreo 8:6-12), mao ang mamahimong balaod sa gingharian sa Mesias, diin ilawom niini ang Israel ug ang tanang pamilya sa yuta ipahiuli balik sa unsa man ang nawala didto sa Eden. Sa tinuod gyod, nianhi si Jesus “aron sa pagpangita ug sa pagluwas niadtong nangawala.” - Lucas 19:10 ■

Senemanang Pagtolun-an Sa Bibliya

Leksyon Para sa Setyembre 21, 2014

Usa ka Bag-ong Kaugmaon

Yabeng Bersikulo: “Kay mao kini ang giingon ni Jehova sa mga panon, ang Dios sa Israel: Mga balay ug kaumahan ug kaparrasan mapalit na usab dinhi niining yutaa.”-Jeremias 32:15

Napiling Kasulatan: Jeremias 32:2-9,14,15

Ang nahimutangan sa leksyon karong adlaw usa ka magul-anon gayod. Si Jeremias, usa ka matinudanon nga Israelita ug propeta sa GINOO gibalhog sa bilanggoan sa walay lain kondili si Zedekiah, ang hari sa Judah-ang duha ka tribo nga dibisyon. Nadismaya si Zedekiah tungod kay gipropesiya man ni Jeremias nga libotan sa mga kaaway ang Jerusalem ug mabuntog kini sa hari sa Babilonia.

Gidugang pa niya pagpropesiya nga ang gingharian ni Zedekiah pagakuhaon, ug siya mamahimong binihag didto sa Babilonia. (Jeremias 32:2-5) Bisan tuod binilanggo na karon sa mga kamot sa iyang mismong kaugalingong hari, ang mga pulong ni Jeremias matuod. Gani, ang tanan niyang gipanulti kabahin sa Jerusalem, kang Zedekiah ug sa iyang gingharian natinuod gayod. Ang mga Israelita nahimo nang mga ulipon sa Babilonia. Wala na sila nanag-iya ug mga balay, mga kaumahan, o mga parasan.

Samtang anaa sa sulod sa bilanggoan, “ang pulong sa GINOO” niabot ngadto kang Jeremias diha sa usa ka makaikag nga paagi. (Bersikulo 6-14) Sa laing pagkasulti sa maong saysay, gipahibalo sa Dios si Jeremias nga ang usa ka uma sa iyang natawhang lungsod sa Anato diin gipanag-iya kaniadto sa iyang uyoan mamahimong magpabilin nga kabtangan sa pamilya basta iya kining paliton. “ang katungod sa paglukat imo man aron sa pagpalit niini,” giingnan sa Dios si Jeremias. Ang anak sa uyoan ni Jeremias niabot didto sa bilanggoan ug nikonpirmar sa mga pulong sa GINOO, nga nagaingon, “ang katungod sa pagpanunod imo man, ug ang paglukat imo; palita kana alang sa imong kaugalingon.” Unya si Jeremias, “nahibalo nga mao kadto ang pulong sa GINOO.” Iyang gipalit ang uma, gihatag ang kuwarta ngadto sa anak sa iyang uyoan,

ug gisegoro ang ebidensiya sa pagpalit uban ang mga gikinahanglan nga mga dokumento, ug gisilyohan kini engkaso ug kinahanglanon nga pamatud-an kini nga transaksyon sa umaabot.

Bisan tuod ang saysay mahitungod sa pagpalit ni Jeremias sa uma sa iyang uyoan walay duda nga matuod gayod, gigamit kini sa GINOO aron sa paghulagway ug usa ka labing mahinungdanong butang kabahin sa Israel. Dayon pagkahuman sa nahaunang saysay nakita nato ang mga pulong sa atong Yabeng Bersikulo, diin nagasaad nga “mga kabalayan ug mga kaumahan ug mga parasan pagapanag-iyahon pag-usab dinhi niining yutaa.” Maingon nga gibawi ni Jeremias ang pagpanag-iya sa kabtangan sa iyang uyoan pinaagi sa pagbayad sa kantidad alang sa paglukat niini, si Jesus nibayad sa kantidad-ang iyang perpektong tawhanong kinabuhiraron sa pagtubos kang Adan. - I Timoteo 2:5,6

Ingon nga gitala sa saysay sa atong leksyon, ang Israel niadtong panahona naulipon sa Babilonia. Ang katawhan naulipon usab sa “sala ug kamatayon” sukad sa pagkahagba ni Adan. (Roma 8:2) Ang nahitabo sa Israel, ang pagpalit ni Jeremias sa uma sa iyang uyoan natuman samtang anaa pa siya sa bilanggoan, ug samtang ang nasod anaa pa sa iyang pagkabinihag. Ang matubsanon nga pagpalit kang Adan ug sa iyang kaliwat pinaagi ni Jesus natuman mga subra na sa duha ka libo ka tuig ang nilabay, atol sa taliwala sa pagkabinihag sa katawhan sa sala ug sa malaksot nga resulta niini. Gani, bisan hangtud karon kini nga kaulipnan nagapadayon.

Sa laing bahin, ang Dios matinud-anon sa iyang mga saad alang sa Israel ug sa tibuok kalibutan. Ang tanang katawhan “ginatubos na ... pinaagi sa bililhong dugo ni Cristo,” ug ilawom na sa iyang “pagpanag-iya.” (I Pedro 1:18,9) Diha sa pagbulig sa Langitnong Amahan, pagapanalanginan ni Cristo ang katawhan kinsa iyang gipalit. Ang tanan nga magatuman sa matarong nga mga balaod sa gingharian sa mesias sa makausa pa magaangkon sa matahom nga paraiso sa Eden nga sa dugay nang panahon nawala. Gani, “mga balay ug mga kaumahan ug mga parasan panag-iyahon pag-usab niining yutaa” sa yuta, ang hingpit ug walay katapusang puloy-anan sa tawo. Pagkamahimayaon nga kaugmaon ang giandam alang sa tawhanong kaliwat. ■

Kahibulongan Nga Mga Posibilidad

***Yabeng Bersikulo:
“Ang tingog sa pagmaya,
ug ang tingog sa kalipay,
ang tingog sa kaslonong
lalake ug kaslonong
babaye, ang tingog
nila nga moingon:
Magpasalamat kamo
kang Jehova sa mga
panon, kay si Jehova
maayo man, kay ang
iyang mahigugmaong-
kalolot nagapadayon
sa walay katapusan;
ug kanila nga modala
sa mga halad sa
pagpasalamat ngadto
sa balay ni Jehova. Kay
papaulion ko gikan sa
pagkabinihag ang yuta,
sama sa una, nagaingon
si Jehova.”-Jeremias
33:11***

***Napiling Kasulatan:
Jeremias 33:2-11***

Sa nahisgotan na sa atong nahaunang leksyon, ang Pulong ni Jehovah nahiabot ngadto kang Jeremias samtang atua pa siya sa bilanggoan, nagmando kaniya nga iyang lukaton ang uma sa iyang uyoan, nagahulagway kon unsaon nga ang makatubos nga kantidad nga gibayran ni Jesus makahatag ug kahigayonan nga sa makausa pa maangkon ang yuta diha sa kahingpit niini. Sa leksyon karong adlaw, atong nabasa nga ang “pulong sa GINOO niabot ngadto kang Jeremias sa ikaduhang higayon, samtang nabalhog pa gihapon siya sa bilanggoan.” (Jer. 33:1) Kini nga ikaduhang mensahe gikan sa Dios nagpuno ug dugang pang mga detalye sa paglaum nga gipahibalo kaniadto. Ang kamahinungdanon sa unsay Iyang isulti kang Jeremias gipakita sa mga pulong sa bersikulo 3. Ang GINOO nag-ingon, “Magapakita Ako kanimo ug dagkung mga butang, ug malisud, nga wala mo hibalo.”

Sa Bersikulo 4-7, gipakita sa Dios ngadto sa propeta nga bisan pa man nga ang balaang siyudad, Jerusalem, ug ang mga panimalay sa hari sa Judah nga “gipanlumpag,” ug nga napuno sa mga “patay’ng lawas” niadtong Iyang gitugotan nga pamatyon tungod sa ilang pagkadautan, kini alang lamang sa limitadong panahon. Sa hustong panahon, giingnan sa Dios si Jeremias, “Dad-on ko niini ang maayong panglawas ug ayohon ko sila, ug igapahayag ko kanila ang kadagaya sa pakigdait ug sa kamatuoran.

Ug papaulion ko gikan sa pagkabinihag ang Juda ug ang Israel, ug tukoron ko sila, sama sa una.”

Dugang pa nga gisulti sa GINOO nga ang “maayong panglawas ug kaayohan” alang sa Israel nagkinahanglan nga pagahinloan ug pasayloon una sila - sa “tanang nilang mga kasal-anan nga tungod niana sila nanagpakasala batok kanako, ug tungod niana sila nakalapas batok kanako.” (Bersikulo 8) Bisan pa nga nahimuot ang Dios sa paghinlo ug pagpasaylo niadtong nakasala batok Kaniya, dili kini mahiabot kang bisan kinsa kondili sila magpahayag una ug usa ka tim-os nga tinguha sa pagbasol ug pagbag-o sa ilang gawi diha Kaniya. Pinaagi sa pagsaad nga iya kining buhaton, klaro kaayo nga gilantaw sa Dios ang pagpangligid sa panahon sa dihang ang Israel magapahayag ra unya sa ingon niana nga kabag-ohan sa kasingkasing. Unya dako gayod kaayo Niyang kalipay sa paghinlo, pagpasaylo, “pag-alim ug pagtambal” kanila.

Ang panahon alang sa katumanan sa maayong kahimuot sa Dios sa iyang katawhan mahitabo sa sinugdanan sa gingharian ni Cristo, sa dihang ang Israel, sa matuod nga pagpaubos ug pagbasol, magaila sa ilang Mesias ug magasinggit, “Dalaygon ang nagaanhi sa ngalan sa Ginoo.” (Mateo 23:39) Unya ang Israel mamahimong “usa ka ngalan sa kalipay, alang sa usa ka pagdayeg ug alang sa usa ka himaya, sa atubangan sa tanang mga nasud sa yuta, nga makadungog sa tanang kaayohan nga pagabuhaton ko kanila, ug sila mangahadlok [managtahod] ug managpangurog tungod sa tanang kaayohan ug sa kabulahanan nga akong pagabuhaton nganha kaniya.” - Jeremias33:9

Ang atong Yabeng Bersikulo nagaingon nga sa makausa pa ang mga tingog sa kasadya, kalipayon, ug pagdayeg sa Dios mulanog sa tibuok yuta sa Israel, samtang ilang isangyaw ang Iyang dakong kaluoy diha kanila. Ingon niana ang mahimayaong mga resulta sa pag-istablisar sa gingharian ni Cristo dinhi sa yuta. Apan, ang mga panalangin alang sa Israel sinugdanan lamang. Ang pulong sa Dios nag-awas-awas sa mga pamahayag diin nagatudlo nga ang mga panalangin sa gingharian molangkob sa “tanang mga nasod sa yuta.” (Genesis 22:18) Ang propeta Isaias naghisingot niini sa dili maihap nga mga higayon, ang pananglitan niini makaplagan nato niining mga pulonga, “Magaan ra kaayo nga butanga nga ikaw mahimong akong alagad aron sa pagbangon sa mga banay ni Jacob, ug sa pagpabalik sa salin sa Israel: ako usab ikaw nga ihatag nga usa ka suga alang sa mga Hentil, aron ikaw mamahimo nga akong kaluwasan hangtud sa kinatuman sa yuta.” (Isaias 49:6) Dalaygon ang Dios kay ang Iyang kaluwasan moabot “ngadto sa kinatuman sa yuta!” ■